

Broj: 01-02-3-1092/17
Sarajevo, 05.09.2017. godine

Z A P I S N I K 22. REDOVNE SJEDNICE PREDSTAVNIČKOG DOMA PARLAMENTA FEDERACIJE BIH, održane 14.06.2017. godine

Sjednica je počela u 11.21.

Sjednici je predsjedavao potpredsjedavajući Predstavničkog doma Parlamenta Federacije BiH Mladen Bošković.

Potpredsjedavajući Bošković pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Alma Aranut, Rusmir Mesihović, Elma Đogić, Halid Muhić, Ljuban Herceg i Zdravko Kuzman.

Prema evidenciji Stručne službe, potpredsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zapisnici 18. redovne sjednice i 19. vanredne sjednice usvojeni su bez primjedbi.

Zastupnik Rusmir Mesihović pokrenuo je inicijativu za izmjene i dopune Zakona o lijekovima i medicinskim sredstvima koja nije usvojena (38 glasova za, osam glasova protiv i 23 uzdržana glasa).

Amra Kunovac pokrenula je inicijativu.

Sa 54 glasa za, uz devet glasova protiv i uz 10 uzdržanih glasova, usvojena je sljedeća:

INICIJATIVA

Prema Vladi Federacije BiH da se poveća procenat izdvajanja od ukupnih prihoda ostvarenih na osnovu doprinosa za obavezno zdravstveno osiguranje (koje sada iznosi 10,2%) Fondu za solidarnost i prema njemu uplati sva dugovanja.

Zastupnička pitanja

Mira Grgić komentarisala je odgovor koji je dobila iz službe Računovodstva vezano uz isplaćene dnevnice za odlazak u Blajburg.

Mahir Mešalić komentarisao je odgovor koji je dobio od Federalnog ministarstva finansija, gdje je tražio da mu se dostavi spisak 50 najplaćenijih funkcionera, uključujući i javna preduzeća sa osnivačkim udjelom Federacije.

Uputio je pitanje Federalnom ministarstvu unutrašnjih poslova i Federalnom ministarstvu finansija, komentarisao je kršenje Zakona o plaćama i naknadama policijskih službenika Federacije BiH, odnosno član 33. Zakona. Između ostalog, kazao je da je donesena instrukcija, kojom je policajcima u kantonima zabranjeno da komentarišu svoje plaće, naknade i sve ostalo vezano uz njihov status.

Sanel Razić zahvalio je Federalnom ministarstvu prometa i komunikacija i preduzeću Ceste na odgovoru i u vezi s tim postavlja nekoliko potpitanja vezano uz strukturu rashodovne strane za 2015. i 2016. godinu za koju je ukupno utrošeno više od 8.000.000 KM. Traži da mu se taksativno dostavi za 2015. i 2016. godinu struktura realiziranih sredstava u iznosu 3.772.417 KM u smislu da se navede dobavljač dobara i usluga, broj fakture te iznos u pojedinim fakturama. Za fakture koje se odnose na ime pruženih usluga traži da mu se dostavi popratni pregled obračuna radnih sati po danima, uključujući broj angažiranih lica na terenu.

Drugo potpitanje odnosi se da Javno preduzeće Ceste Federacije - da li imaju adekvatne mjere za efikasnu kontrolu utrošaka sredstava, te da li vrše bilo kakav nadzor na terenu obračuna i utrošaka ovih namjenskih sredstava.

Amra Haračić pitanje upućuje Federalnom ministarstvu turizma i okoliša a vezano je za aktueliziranu priču u vezi sa okolinskom dozvolom i radom firme "Energysolution".

Također, podsjeća resorno ministarstvo na tematsku sjednicu o zagađenosti zraka u Federaciji BiH i donesene zaključke, te ih poziva da u postupku izdavanja okolinskih dozvola postupaju u skladu sa zakonskim propisima. Postavlja pitanje – da li je neophodno da ovakvo postrojenje bude izrađeno upravo tamo gdje je najveće zagađenje i koliko će dobra a koliko štete donijeti lokalnoj zajednici.

Amra Kunovac pitanje je postavila Vladi Federacije BiH - da li Strategija vezana uz unapređenje prava i položaj osoba sa invaliditetom, koja je donesena obavezujuća za sve nivoe vlasti u smislu da im se omogući uključivanje i sudjelovanje u svim oblastima društva na ravnopravan način.

Drugo pitanje – dokle se došlo u realizaciji socijalnog stanovanja, šta je sa porodicama djece sa invaliditetom koja su stambeno nezbrinuta.

Jusuf Bubica komentarisao je pitanje vezano uz prikupljanje sredstava od akciza na gorivo od putarina do registracije vozila, budžetskih sredstava, kreditnih sredstava i donatorskih sredstava. Traži od nadležnih da mu dostave ukupnu cifru koliko je sredstava u periodu od 2006. do 2016. godine utrošeno na izgradnju puteva a koliko je puteva napravljeno.

Damir Mašić pokrenuo je inicijativu da Predstavnički dom Parlamenta Federacije BiH pokrene inicijativu i obaveže Vladu Federacije BiH da analizira i uradi sljedeće: analizira da li je potrebno mijenjati zakone ili interne akte preduzeća koja imaju nacionalni predznak.

Pitanje – koliko je bilo zaposlenika u preduzećima u većinskom vlasništvu Federacije BiH od 31.12.2015. do danas? Da li su postojali javni konkursi i ako nisu, ko ima diskreciono pravo da zapošljava ljude bez konkursa?

Naredno pitanje vezano je uz Ekonomski savjet Vlade Federacije BiH - ko su članovi savjeta, ko ih plaća i koliko su plaćeni?

Dževad Adžem pokrenuo je inicijativu da Predstavnički dom Parlamenta Federacije BiH obaveže Vladu Federacije BiH da prije rebalansa Budžeta za 2017. godinu projekt izgradnje brze ceste na relaciji Prača - tunel Hranjen - Goražde uvrsti u Program javnih investicija Vlade Federacije za srednjoročni period 2017.-2019.

Pitanje je postavio premijeru i ministrici finansija – koliko iznose procenti bruto društvenog proizvoda za javne usluge red i sigurnost, zdravstvo, obrazovanje i socijalnu zaštitu.

Drugo pitanje vezano je uz investicije – koliko je u ovom mandatnom periodu Vlada Federacije imala stranih investicija u periodu od 2015. do 2017. godina, koliko je priliv sredstava u ovom periodu došao od dijaspore, koliko je prihoda od privatizacije i kakvo je uopće stanje kada se govori o investicijama?

Naredno pitanje je, također, upućeno Vladi Federacije BiH - koje mjere je Vlada poduzela i koji su efekti stimuliranja izvoznoorijentiranih privrednika i koliko je otvorio novih radnih mjesta?

Alma Kratina pokrenula je inicijativu prema Vladi, resornom ministarstvu i Državnoj upravi za zaštitu zdravlja bilja, za preispitivanje i stavljanje van snage izmjene državnih pravilnika koje tretiraju uvoz sjemena i sadnog materijala objavljenih u "Službenom glasniku BiH", br. 29/17. od 06.04.2017. godine.

Mujo Hodžić pitanje je uputio u ime Kluba zastupnika DF – šta je poduzelo Federalno ministarstvo zdravstva po pitanju potpisivanja Kolektivnog ugovora sa Sindikatom doktora medicine i stomatologije u periodu januar – juni 2017. godine?

Elvir Karajbić prvo pitanje uputio je prema Registru vrijednosnih papira Federacije BiH i traži dostavljanje spiska svih preduzeća kojima je Vlada većinski vlasnik a koji su upisani u navedeni registar.

Drugo pitanje, također, upućuje Vladi Federacije BiH i traži da mu se dostave podaci koliko su iz budžeta za 2015. i 2016. godinu podijelili sredstava nevladinim organizacijama, kojim organizacijama pojedinačno, koje iznose i po kojim kriterijima?

Boris Barun pitanje je uputio Upravi za inspekcijske poslove Federacije BiH - koliki je broj kontrola u 2016. godini u pojedinim kantonima izvršila Federalna tržišna inspekcija i Federalna turističko-ugostiteljska inspekcija? Koliki je broj subjekata kontrole po pojedinim kantonima iz nadležnosti iz svake od navedenih inspekcija, te koliko je za subjekte iz svakog kantona iz nadležnosti svake od ovih inspekcija izdato prekršajnih naloga i koliki je iznos tih prekršajnih naloga u KM, koliko je podneseno prekršajnih prijava te koliki je ukupan broj izdatih upravnih mjera po svakom kantonu u 2016. godini?

Slavica Josipović pitanje je uputila direktoru Autocesta Federacije BiH, vezano uz trasu brze ceste Lašva - Nević Polje.

Almir Zulić pitanje je uputio Federalnoj upravi za inspekcijske poslove - traži izvještaj o broju izdatih naloga po svim kantonima od 01.01.2016. godine do 30.06.2017. godine, traži, također, da mu se dostavi iznos naplaćen od kazni u svim kantonima u istom periodu, iznos utroška sredstava koje su inspektori potrošili prilikom inspekcijskog nadzora na terenu, uz pojašnjenje na koji način se vrši izbor mjesta boravka, odnosno spavanja inspektora na terenu. Traži informaciju da li se Federalna inspekcija prilikom tog boravka na terenu koordinira sa kantonalnom inspekcijom i da li im se poslovi iz njihove nadležnosti podudaraju ili ne, budući da imamo situaciju na terenu kad federalna inspekcija ode sa mjesta nastupa kantonalna inspekcija, te se stvara pritisak prema poduzetnicima koji gube interes za poslove.

Jasmina Zubić komentarisala je odgovore na neka postavljena pitanja. Pitanje je uputila Federalnom ministarstvu za pitanja boraca i invalida odbrambeno-oslobodilačkog rata a glasilo je: u kojoj fazi je donošenje zakona o izmjenama i dopunama Zakona o pravima branilaca i članova njihovih porodica. Ponovo postavlja pitanje – kada će Vlada iznaći sredstva i realizirati zaključak kojim je Federalni parlament krajem 2015. ili početkom 2016. godine obavezao Vladu da iznađe zakonske pretpostavke i sredstva za poboljšanje statusa RVI 100% I. grupe?

Uputila je inicijativu Upravnom odboru Zavoda zdravstvenog osiguranja Zeničko-dobojskog kantona, kojom traži da se uskladi cjenovnik ortopedskih pomagala sa jedinstvenom listom pomagala zuboprotetskih sredstava, endoproteza i medicinskih indikacija ("Službene novine FBiH", br. 4/04) i to u dijelu cjenovnika tačke 1. h) "silikonski uložak sa adapterom", iza rečenice brišu se riječi: "za RVI" i na taj način će se otkloniti diskriminacija i omogućiti pravo na ovo ortopedsko pomagalo i neratnim invalidima, što je u skladu sa evropskim standardima o zabrani diskriminacije, koje je naša zemlja ratificirala.

Osvrnula se na odgovor koji je dobila na postavljeno pitanje - kada će početi primjena nove liste invaliditeta od strane Instituta za medicinsko vještačenje? Pita da li je Pravilnik usvojen jer je trebalo da bude na Upravnom odboru 29.05., ukoliko nije zašto nije a ukoliko jeste kada će početi primjena?

Dobila je odgovor na pitanje u vezi sa realiziranjem usvojenog zaključka koji je Dom usvojio na prijedlog zastupnice Alme Kratina, da se iznađu sredstva za finansiranje Roditeljske kuće. Ministarstvo za rad u odgovoru je navelo da nije nadležno za ovo, te ponovo inicijativu upućuje Federalnom ministarstvu zdravstva.

Jasna Duraković-Hadžiomerović dala je komentare na odgovore koje je dobila od Federalnog ministarstva pravde i Federalnog ministarstva za rad i socijalnu politiku, a odnosi se na osnivanje Alimentacijskog fonda.

Pita Federalno ministarstvo finansija - da li postoji neki jasniji finansijski plan i program kako realizirati Zaključak Vlade donesen u februaru 2014. godine (navela je član 237. Porodičnog zakona Federacije BiH, gdje se, između ostalog, kaže da se mogu osigurati sredstva iz budžeta ukoliko se utvrdi da neko od roditelja nije u mogućnosti podmirivati potrebe izdržavanja djeteta).

Potpitanje za Federalno ministarstvo rada i socijalne politike – da li postoji prostor za donošenje podzakonskog akta u formi uredbe i da li je potrebno podnijeti neku inicijativu kako bi se počelo raditi na rješavanju ovog pitanja?

Vjekoslav Bakula pitanje je uputilo Federalnom ministarstvu zdravstva - budući da je Ministarstvo donijelo Pravilnik o bližim uvjetima vezan za prostor, opremu kadra i kriterijima za osnivanje i obavljanje liječničke djelatnosti kao i načinu i postupku njihove verifikacije. Da li je donesen pravilnik o primjeni na cijeloj teritoriji Federacije BiH, mogu li kantoni donositi vlastite pravilnike koji mijenjaju uvjete propisane pravilnikom, koji ljekari u Zapadnohercegovačkom kantonu imaju rješenja o ispunjenosti propisanih uvjeta vezano uz kadrovski prostor i medicinsko-tehničku opremu ili bilo kakve dokumente koji su poslužili kao dopuštenje za rad u Zapadnohercegovačkom kantonu, kako su ga dobili i traži kopije rješenja kao i zahtjev za izdavanje tih rješenja.

Traži da ga se izvjesti kojim ljekarima je dato rješenje u skladu sa tim pravilnikom a koji su u suprotnosti sa njim, kao i Zaključak šta je Federalno ministarstvo zdravstva učinilo u vezi sa poštovanjem odredbi Pravilnika, budući da se on u Zapadnohercegovačkom kantonu ne primjenjuje.

Upućuje inicijativu da se klupe u sali označavaju u skladu sa nazivima stranaka.

Ilhan Bušatlić pita kada će se na dnevnom redu Doma naći Zakon o igrama na sreću i Zakon o šumama?

Drugo pitanje upućeno je Federalnom ministarstvu unutrašnjih poslova i FUP-u – kada su pripadnici jedinice za podršku MUP-a Srednjobosanskog kantona imali sistematski, posebno psihološki pregled?

Treće pitanje uputio je Federalnoj direkciji cesta – kada će se uraditi potpuna rekonstrukcija puta Bugojno – Novi Travnik na relaciji koja prolazi pored Tvornice “Bratstvo” Novi Travnik koji je potpuno uništen.

Kazao je i da će postaviti dva manje ozbiljna pitanja a jedno se tiče člana predsjedništva Bakira Izetbegovića i korištenja službenog vozila, te premijera Novalića u vezi sa zapošljavanjima.

Suzana Franjka Galić prvo pitanje uputila je Federalnom ministarstvu poljoprivrede, vodoprivrede i šumarstva - šta je poduzeto da se zaštite proizvođači malina i smilja?

Blaž Župarić djelimično je zadovoljan odgovorom Federalnog ministarstva poljoprivrede, vodoprivrede i šumarstva i Agencije za vodno područje sliva Save, apelira na Ministarstvo i Agenciju da se aktiviraju i ubrzaju postupak izgradnje Crpne stanice Vidovice.

Jasmin Kadić pitanje je uputio Elektroprivredi BiH - da li će doći do poskupljenja cijene električne energije za domaćinstva od 01.07.2017. godine?

Drugo pitanje uputio je Vladi Federacije BiH - kada će se Vlada izjašnjavati o inicijativi koju je pokrenuo za donošenje odluke prema kojoj će biti smijenjeni svi direktori i izvršni direktori, odnosno uprave u javnom preduzeću u većinskom vlasništvu Federacije, ako su imali negativno poslovanje?

Treće pitanje upućeno je Vladi i svim ministarstvima koja imaju ovlaštenja u javnim preuzećima - da li su javna preduzeća iz nadležnosti ministarstava dostavila izvještaj o radu i poslovanju za 2015. i 2016. godinu, kako su to skupštine javnih preduzeća obavezne prema članu 6. Zakona o javnim preduzećima, te kada će ona biti dostavljena Parlamentu Federacije BiH na razmatranje?

Pitanje je uputio Elektroprivredi BiH – da li su još na snazi ugovori o nabavci uglja za termoelektrane prema kojima se isplaćuju premije na osnovu višeg kvaliteta iz poručenog uglja i koliko je na ime premija a na osnovu boljeg kvaliteta isporučenog uglja isplaćenog u 2016. godini?

Faruk Ćupina pitanje je uputio Federalnom ministarstvu kulture i sporta – u kojoj fazi izrade se nalazi Nacrt Strategije mladih Federacije BiH, te kada će biti upućen u parlamentarnu proceduru?

Drugo pitanje uputio je Federalnom ministarstvu zdravstva – da li se pristupilo izradi i ukoliko jeste u kojoj je fazi izrada izvještaja o sistemu zaštite mentalnog zdravlja stanovništva u Federaciji BiH uz analizu modela za njegovo unapređivanje?

Vesna Švancer kazala je da je više puta upućivala pitanja prema Federalnom ministarstvu poljoprivrede, vodoprivrede i šumarstva - prema Zakonu o poticajima i primarnoj poljoprivrednoj proizvodnji od 2010. godine potvrđeno je da svaku godinu donošenja

programa za poticaje iznosi 3% od ukupno 6% ukupnih sredstava budžeta. U tekućoj godini je to manje od 2,5 % i zašto je to tako?

Zašto se neizmirena dugovanja za poticaje iz ranijih perioda ne stave na teret Federacije jer već opterećuju tekući godišnji program poticaja?

Da li se poštuje Zakon o upravnom postupku kod dodjele poticaja i da li se prema Odluci o utrošku sredstava za 2017. godinu dodjeljuje poticaj za uveznu prasad ako je to u skladu sa Zakonom o poticaju u poljoprivrednoj proizvodnji, da li je prema navedenoj odluci plasiran poticaj i za jagnjad i ako nije zbog čega nije, također, da li su izvršene isplate poticaja određenim korisnicima a čiji zahtjevi za isplatom su predmet istražnih radnji nadležnih organa, ako jeste, za koje korisnike su izvršene isplate poticaja za 2016. i 2017. godinu?

Da li se prema Strategiji Srednjoročnog razvoja poljoprivrednog sektora u Federaciji BiH 2015.-2018. poštuju sredstva predviđena za poticaje?

Prešlo se na izmjene i dopune dnevnog reda.

U raspravi o izmjenama i dopunama dnevnog reda učestvovali su: Ismet Osmanović, Damir Mašić, Ilhan Bušatlić, Elvir Karajbić, Dženan Đonlagić, Jozo Bagarić, Dževad Adžem, Safet Kešo, Jasna Duraković-Hadžiomerović, Nermin Nikšić, Elvir Karajbić i Mahir Mešalić.

Potpredsjedavajući je pozvao predsjednike klubova zastupnika na petominutnu konsultaciju.

Nakon kratkih konsultacija potpredsjedavajući je izvjestio zastupnike da je dogovoreno da se glasa o skidanju sljedećih tački: 2. Prijedlog Zakona o izmjeni Zakona o stvarnim pravima Federacije BiH – skraćeni postupak; 3. Prijedlog Zakona o izmjeni i dopuni Zakona o stvarnim pravima Federacije BiH - skraćeni postupak (predlagač: Faruk Ćupina); 4. Prijedlog Zakona o izmjeni i dopuni Zakona o stvarnim pravima Federacije BiH- skraćeni postupak (predlagač: Dennis Gratz) i 8. Nacrt Zakona o provođenju odluka sudova, što je usvojeno (75 glasova za, jedan glas protiv i šest uzdržanih glasova).

Elvir Karajbić je, u ime Kluba zastupnika SDP, predložio da se u dnevni red uvrsti tačka - Zakon o izmjenama i dopunama Zakona o PIO Federacije BiH - što nije usvojeno (34 glasa za, 20 glasova protiv i 22 uzdržana glasa).

Potpredsjedavajući je pozvao zastupnike da se izjasne o zaključku koji je predložio Damir Mašić (da Predstavnički dom Parlamenta Federacije BiH zaduži Upravni odbor Kliničkog centra Univerziteta u Sarajevu da Sebiju Izetbegović odmah razriješi dužnosti generalne direktorice, te da Predstavnički dom zaduži Vladu Federacije BiH da razriješi Upravni odbor Kliničkog centra Univerziteta u Sarajevu ukoliko ne razriješe Sebiju Izetbegović dužnosti generalne direktorice), a koji pojedinačnim izjašnjavanjem nije usvojen (38 glasova za, 34 glasa protiv i osam uzdržanih glasova).

Drugi prijedlog zaključka Damira Mašića, kojim se zadužuje premijer Vlade Federacije BiH da Ustavnom sudu Federacije u što kraćem roku podnese zahtjev za ocjenu ustavnosti Odluke o visini tarifnih stavova KJKP "Toplane Sarajevo" doo Sarajevo (broj: 02-05-20105-2/17 od 31.05.2017.) koju je na 78. vanrednoj sjednici (31.05.2017.) donijela Vlada Kantona Sarajevo, te zahtjev za određivanje Privremene mjere kojom bi se van snage stavila primjena ove odluke do konačne odluke Ustavnog suda. Premijer se zadužuje da u roku od 15 dana od dana usvajanja ovog zaključka pismeno informira Predstavnički dom FBiH o poduzetim aktivnostima na provedbi zaključka, nije usvojen (37 glasova za, 30 glasova protiv i sedam uzdržanih glasova).

Prijedlog Vlade da se Prijedlog Zakona o izmjenama Krivičnog zakona Federacije BiH razmatra po hitnom postupku, usvojen je (53 glasa za, četiri glasa protiv i 18 uzdržanih glasova).

Na osnovu pojedinačnog izjašnjavanja, sa 51 glasom za, uz sedam glasova protiv i uz 14 uzdržanih glasova, usvojen je sljedeći:

D N E V N I R E D

1. Prijedlog Zakona o izmjenama Krivičnog zakona Federacije BiH – hitni postupak,

2. Prijedlog Zakona o izmjenama i dopunama Zakona o unutrašnjoj trgovini,
3. Prijedlog Zakona o izmjenama i dopunama Zakona o upravljanju otpadom,
4. Nacrt Zakona o koncesijama,
5. Usaglašavanje tekstova zakona različito usvojenih u domovima Parlamenta Federacije BiH,
6. Izbori i imenovanja.

Pauza do 15 sati.

Nakon pauze, potpredsjedavajući je pozvao zastupnike se da izjasne o zaključcima Tematske sjednice "Stanje i perspektive drveno-prerađivačke industrije u Federaciji BiH", a koji su usvojeni.

1. Prijedlog Zakona o izmjenama Krivičnog zakona Federacije BiH – hitni postupak

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Na Prijedlog Zakona jedan amandman podnio je Dennis Gratz, koji Vlada nije prihvatila. Zastupnik Gratz nije bio u sali te se o njegovom amandmanu nije glasalo.

Sa 50 glasova za, uz pet glasova protiv i uz 15 uzdržanih glasova, usvojen je Prijedlog Zakona o izmjenama Krivičnog zakona Federacije BiH.

2. Prijedlog Zakona o izmjenama i dopunama Zakona o unutrašnjoj trgovini

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je ministar Zlatan Vujanović.

Na Prijedlog Zakona jedan amandman podnio je Dennis Gratz, koji Vlada nije prihvatila. Zastupnik Gratz nije bio u sali te se o njegovom amandmanu nije glasalo.

U ime nadležnog odbora obrazlagao je Sanel Razić.

Sa 51 glasom za, uz 11 glasova protiv i uz 10 uzdržanih glasova, usvojen je Prijedlog Zakona o izmjenama i dopunama Zakona o unutrašnjoj trgovini.

3. Prijedlog Zakona o izmjenama i dopunama Zakona o upravljanju otpadom

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dala je ministrica Edita Đapo.

Amra Haračić podnijela je jedan amandman koji je Vlada prihvatila: U članu 5. kojim se dopunjuje član 53. u stavu 1. dodati sljedeće:

- "transportuje otpad na način koji može izazvati zagađenje okoliša suprotno odredbama člana 32. stav 1.; - u slučaju zagađenja nastalog u toku transporta, prijevoznik ne obavi čišćenje i dovođenje u prvobitno stanje zagađenog područja, suprotno odredbama člana 32. stav 2.; - ne isporuči otpad na odredište koje je odredio pošiljalac, a koje je odobreno kao lokacija za upavljanje otpadom, suprotno odredbama člana 32. stav 4.; - ako prijevoznik u slučaju nemogućnosti isporuke na odredište ne vrati otpad pošiljaocu suprotno odredbama člana 32. stav 5."

Sa 56 glasova za, uz devet glasova protiv i uz pet uzdržanih glasova, usvojen je Prijedlog Zakona o izmjenama i dopunama Zakona o upravljanju otpadom.

4. Nacrt Zakona o koncesijama

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

U ime Vlade Federacije BiH dodatno obrazloženje dao je resorni ministar.

Rasim Omerović je, u ime Komisije za lokalnu samoupravu, kazao da Komisija smatra da Nacrt Zakona treba vratiti na doradu i dao obrazloženje.

Potpredsjedavajući Bošković kazao je da je Savez općina i gradova Federacije uputio dopis u kojem piše da ima dosta primjedbi te da će ih dostaviti tokom javne rasprave.

U raspravi su učestvovali: Elvir Karajbić, Bajro Makić, Jasmina Zubić, Slavica Josipović, Faruk Čupina, Jusuf Bubica i Muhamed Ibrahimović.

Predložen je uobičajeni zaključak.

Sa 52 glasa za, uz osam glasova protiv i uz osam uzdržanih glasova, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o koncesijama i smatra da može poslužiti kao osnova za izradu prijedloga Zakona.

Zadužuje se predlagač da organizira i provede javnu raspravu u trajanju 90 dana.

Zadužuje se Vlada Federacije BiH da prilikom izrade prijedloga Zakona ima u vidu sve sugestije, primjedbe i prijedloge iznesene u raspravi, kao i one koje su dostavljene ili će biti dostavljene u pisanom obliku.

Za 5. i 6. tačku - Usaglašavanje tekstova zakona različito usvojenih u domovima Parlamenta Federacije BiH i Izbori i imenovanja - nije bilo materijala za razmatranje.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Stela Ibrović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić